

四庫全書

子部

欽定四庫全書

子部

薛氏醫案卷二十六

詳校官太醫院八品吏目臣黃發

編修臣倉聖脈覆勘

總校官原任中允臣王燕緒

校對官助教臣卜維吉

謄錄監生臣魏繩曾

欽定四庫全書

薛氏醫案卷二十六

明薛己訂

婦人良方

調經門 凡醫婦人先須調經故以為首

月經序論第一

岐伯曰女子七歲腎氣盛齒更髮長二七而天癸至任脈通太衝脈盛月事以時下天謂天真之氣癸謂壬癸

之水故云天癸也然衝為血海任主胞胎二脈流通經血漸盈應時而下常以三旬一見以像月盈則虧也若遇經行最宜謹慎否則與產後症相類若被驚怒勞役則血氣錯亂經脈不行多致勞瘵等疾若逆於頭面肢體之間則重痛不寧若怒氣傷肝則頭暈脇痛嘔血而瘵癥癰瘍若經血內滲則竅穴淋瀝無已凡此六淫外侵而變症百出犯時微若秋毫成患重如山岳可不畏

哉

愚按血者水穀之精氣也和調五臟洒陳六腑在男子則化為精在婦人上為乳汁下為血海故雖心主血肝藏血亦皆統攝於脾補脾和胃血自生矣凡經行之際禁用苦寒辛散之藥飲食亦然詩云婦人和平則樂有子和則陰陽不乖平則氣血不爭故經云平和之氣三旬一見可不慎歟

精血篇第二

齊大夫褚澄遺書

飲食五味養骨髓肌肉毛髮男子為陽陽中必有陰陰

中之數八故一八而陽精升二八而陽精溢女子為陰
陰中必有陽陽中之數七故一七而陰血升二七而陰
血溢皆飲食五味之實秀也方其升也智慮開明齒牙
更始髮黃者黑筋弱者強暨其溢也凡充身體手足耳
目之餘雖針芥之歷無有不下凡子形肖父母者以其
精血嘗於父母之身無所不歷也是以父一肢廢則子
一肢不肖其父母一目虧則子一目不肖其母然雌鳥
北獸無天癸而成胎何也鳥獸精血往來尾間也精未

通而御女以通其精則五體有不滿之處異日有難狀之疾陰已痿而思色以降其精則精不出而內敗小便澁而為淋精已耗而復竭之則大小便牽痛愈痛則愈便愈便則愈痛女人天癸既至踰十年無男子合則不調未踰十年思男子合亦不調不調則舊血不出新血誤行或漬而入骨或變而為腫後雖合而難子合多則滯枯虛人產衆則血枯殺人觀其精血思過半矣

愚按丹溪先生云人受天地之氣以生天之陽氣為

氣地之陰氣為血故氣常有餘血常不足夫人之生也男子十六歲而精通女子十四歲而經行故古人必待三十二十而後嫁娶可見陰氣之難成而養之必欲其固也經曰年至四十陰氣自半而起居衰矣夫陰氣之成止供給得三十年之運用況男子六十四歲而精絕女子四十九歲而經斷夫腎乃陰中之陰也主閉藏者肝乃陰中之陽也主疏泄者然而二臟皆有相火其系上屬于心心火一動則相火翕然

而從之所以丹溪先生只是教人收心養性其旨深
矣天地以五行更迭衰旺而成四時人之五臟六腑
亦應之而衰旺如四月屬巳五月屬午為火大旺火
為肺金之夫火旺則金衰六月屬未為土大旺土為
水之夫土旺則水衰況腎水嘗藉肺金為母以補其
不足古人於夏月必獨宿而淡味兢兢業業保養金
水二臟正嫌火土之旺爾經又曰冬藏精者春不病
溫十月屬亥十一月屬子正火氣潛藏必養其本然

之真以助來春生發之氣則春末夏初無頭痛脚軟
食少體熱注夏之病矣竊謂人之少有老態不耐寒
暑不勝勞役四時迭病皆因氣血方長而勞心虧損
或精血未滿而早斲喪故見其症難以名狀若左尺
脈虛弱或細數是左腎之真陰不足也用六味丸右
尺脈遲軟或沈細而數欲絕是命門之相火不足也
用八味丸至於兩尺微弱是陰陽俱虛用十補丸此
皆滋其化源也不可輕用黃柏知母之類設或六淫

外侵而見諸症亦因其氣內虛而外邪湊襲尤宜用
前藥

附治驗

男子陰痿精耗治
驗見內科摘要

一婦人年三十有七早孀居兩腿骨作痛晡熱體倦
月經不調或發寒熱數年矣一日頸項兩側結核兩
脇脹痛此係肝經鬱火而成也先用小柴胡湯合四
物數劑肝症頓愈又用加味逍遙散加澤蘭乳香沒
藥三十劑血症漸痊再用加味歸脾等藥年餘而安

一孀婦兩腿作痛或用除濕化痰等藥遍身作痛而無定處余曰此血症也不信乃服流氣飲之類而歿一放出宮人年四十餘腎腿內股作痛晡熱口乾月經不調此係肝經血少不能養經絡而然也宜用加味道遙散加澤蘭葉五十餘劑諸症稍緩又以歸脾湯兼服二百餘劑而痊

一放出宮人臀腿腫痛內熱晡熱惡寒體倦咳嗽胸痞月經過期而少彼以為氣毒流注服清熱理氣之

劑益甚余曰此乃肝經瘀血停留所致蓋肝經上貫
鬲布脇肋循喉嚨下循膈內賺繞陰器抵少腹主治
之法但當補其所不勝而制其所勝補者脾也制者
肝也經曰虛則補之實則瀉之此定法也彼不信仍
服前方遂致不起

附方

六味丸

八味丸

二方見二十四卷第十一論

十補丸

方見二十四卷第四論即
十全大補湯料煉密為丸

小柴胡湯

方見二十四卷第二論

四物湯

方見二十四卷第六論

加味逍遙散

加味歸脾湯

二方見二十四卷第四論

產寶方序論第三

大率治病先論其所主男子調其氣女子調其血氣血
者人之神也然婦人以血為基本苟能謹於調護則血

氣宣行其神自清月水如期血凝成孕若脾胃虛弱不能飲食榮衛不足月經不行肌膚黃燥而無光澤寒熱腹痛難於子息或帶下崩漏血不流行則成癥症

愚按前症若婦人脾胃久虛以致氣血俱衰遂而月經不行宜補其胃氣滋其化源或患中消胃熱津液不生而致血海乾涸宜清胃補脾其經自行矣經曰胃者衛之源脾者榮之本鍼經曰榮出中焦衛出上焦衛不足益之必以辛榮不足補之必以甘甘辛相

合脾胃健而榮衛生是以氣血俱旺也或因勞心虛火妄動月經錯行宜安心補血瀉火此東垣先生治法也

王子亨方論第四

論曰經者常候也謂候其一身之陰陽愆伏知其安危故每月一至太過不及皆為不調陽太過則先期而至陰不及則後時而來其有乍多乍少斷絕不行崩漏不止皆由陰陽衰盛所致

愚按經云脾統血肝藏血此症多因恚怒傷肝鬱結傷脾所致當從二經為主而參以前論治之

月水不調方論第五

婦人月水不調由風邪乘虛客於胞中而傷衝任之脈損手太陽少陰之經蓋衝任之脈皆起於胞中為經絡之海與手太陽小腸手少陰心經為表裏上為乳汁下為月水然月水乃經絡之餘苟能調攝得宜則經應以時矣

愚按經曰飲食入胃遊溢精氣上輸於脾脾氣散精上歸於肺通調水道下輸膀胱水精四布五經並行東垣先生所謂脾為生化之源心統諸經之血誠哉是言也竊謂心脾平和則經候如常苟或七情內傷六淫外侵飲食失節起居失宜脾胃虛損心火妄動則月經不調矣又丹溪先生云先期而至者血熱也後期而至者血虛也愚則謂先期而至者有因脾經血燥有因脾經鬱火有因肝經怒火有因血分有熱

有因勞役火動過期而至者有因脾經血虛有因肝
經血少有因氣虛血弱主治之法脾經血燥者加味
逍遙散脾經鬱火者歸脾湯肝經怒火者加味小柴
胡湯血分有熱者加味四物湯勞役火動者補中益
氣湯脾經血虛者人參養榮湯肝經血少者六味地
黃丸氣虛血弱者八珍湯益血生於脾土故云脾統
血凡血病當用苦甘之劑以助陽氣而生陰血也

附治驗

一婦人發熱口乾月經不調兩腿無力或用祛風滲濕之劑腿痛體倦二膝浮腫經事不通余作足三陰經血虛火燥名鶴膝風用六味八味二丸兼服兩月形體漸健飲食漸進膝腫漸消半載而痊

一婦人月事未期而至發熱自汗或用清熱止汗之劑作渴頭眩手掉身麻余曰此肝經血虛火動火為陽陽盛則生風用柴胡炒芍連山梔歸芍生地丹皮各一錢參芪苓朮各一錢五分川芎七分甘草五分二

劑汗止更用補中益氣而愈

一婦人經行勞役忽然昏憤面赤吐痰余曰此乃去血過多陽無所附故耳急飲童便碗許神思漸爽更用參芪各五錢芍歸各三錢玄參柴胡山梔炙草各一錢一劑又用逍遙散加五味麥門二劑如此月餘漸愈但體倦面黃又以十全大補加五味麥門治之而愈

一婦人性善怒產後唇腫內熱或用清熱敗毒散唇

口腫脹日晡熱甚月水不調再用降火化痰遂令食
少作嘔大便不實唇出血水又用理氣消導胸膈痞
滿頭目不清唇腫經閉又用清胃行血肢體倦怠發
熱煩燥涎水湧出又欲用通經之劑余曰病本七情
肝脾虧損又數行攻伐故元氣之益虛耳法當補陰
益陽遂以濟生歸脾湯加味逍遙散補中益氣湯調
治元氣漸復諸症悉愈

薑黃散 治瘀血凝滯肚腹刺痛或腹脹發熱口乾等

症

薑黃

當歸

酒拌各二錢

蓬朮

醋炒

紅花

桂心

川芎

玄胡索

炒

牡丹皮

各五分

右水酒各一半煎服

醋附丸

治元臟虛冷月候不調頭眩少食渾身寒熱

腹中急痛赤白帶下心忡氣悶血中虛寒胎氣不固

用醋煮香附半觔焙為末醋糊丸桐子大每服三四

十九米飲下

愚按前症若元臟虛寒手足逆冷用八味丸手足發熱用六味丸氣血不足用八珍湯中氣不足用補中益氣湯脾氣不足用六君子湯脾氣鬱結用歸脾湯若例用香散之劑恐傷氣燥而陰血漸衰也

附方

加味逍遙散

八珍湯

歸脾湯

三方見二十四卷第四論

加味小柴胡湯 方見二十四卷第二論

加味四物湯

六君子湯 二方見二十四卷第六論

補中益氣湯 方見二十四卷第六論

人參養榮湯 方見二十四卷第三論

八味丸

六味丸 二方見二十四卷第十一論

月經不通方論第六

婦人月水不通或因醉飽入房或因勞役過度或因吐血失血傷損肝脾但滋其化源其經自通若小便不利苦頭眩痛腰背作痛足寒時痛久而血結於內變為癥瘕若血水相併脾胃虛弱壅滯不通變為水腫若脾氣衰弱不能制木水漬肌肉變為腫滿當益其津液大補脾胃方可保生

愚按經水陰血也屬衝任二脈上為乳汁下為月水其為患有因脾虛而不能生血者有因脾鬱而血不

行者有因胃火而血消爍者有因脾胃損而血少者
有因勞傷心而血少者有因怒傷肝而血少者有因
腎水不能生肝而血少者有因肺氣虛不能行血者
治療之法若脾虛而不行者調而補之脾鬱而不行
者解而補之胃火而不行者清而補之脾胃損而不
行者溫而補之勞傷心血而不行者逸而補之怒傷
肝而不行者和而補之肺氣虛而不行者補肝胃腎
虛而不行者補脾肺經云損其肺者益其氣損其心

者調其榮衛損其脾者調其飲食適其寒溫損其肝者緩其中損其腎者益其精旨當審而治之

附治驗

一婦人停食飽悶發熱或用人參養胃湯益甚再用木香檳榔丸泄瀉吐痰腹中成塊飲食少思又用二陳黃連厚朴之類前症益甚腹脹不食月經不至余以為胃氣虧損用補中益氣加茯苓半夏三十餘劑脾胃健而諸症愈又二十餘劑而經自行

一婦人飲食後或腹脹或吞酸彼服枳朮丸吞酸益甚飲食日少胸膈痞滿腿內酸痛畏見風寒又服養胃湯一劑腿內作痛又二劑腿膝浮腫月經不行余謂鬱結所傷脾虛濕熱下注侵晨用四君二陳芎歸午後以前湯送越鞠丸飲食漸進諸症漸愈又用歸脾八珍二湯兼服兩月餘而經行

一婦人性沈多慮月經不行胸膈少食或作脹或吞酸余以為中氣虛寒用補中益氣加砂仁香附煨薑

二劑胸膈和而飲食進更以六君加芎歸貝母桔梗
生薑大棗數劑脾胃健而經自調矣

一婦人素有胃火或用清胃散而安後因勞役躁渴
內熱肌肉消瘦月經不行余謂此胃火消燥陰血用
逍遙散加丹皮炒梔以清胃熱用八珍湯加茯苓遠
志以養脾血而經自行矣

一婦人久患瘧形體怯弱內熱晡熱自汗盜汗飲食
少思月事不行或用通經丸虛症悉具余曰此因虛

而致瘧因瘧以閉經也用補中益氣及六味地黃丸各百餘劑瘧愈而經自行

一婦人久患瘧瘧作則經不行形虛脈大頭痛懶食大便泄瀉小便淋瀝口乾唇裂內熱腹膨蓋由久瘧正氣已虛陰火獨旺用補中益氣湯治之尋愈惟不時頭痛乃加蔓荊子而痛止又兼用六味地黃丸而經行

一婦人因勞耳鳴頭痛體倦此元氣不足用補中益

氣加麥門五味而痊三年後得子因飲食勞倦前症益甚月經不行晡熱內熱自汗盜汗用六味地黃丸補中益氣湯頓愈

一婦人胃氣素弱為哭母吐血咳嗽發熱盜汗經水三月不行余以為悲則傷肺思則傷脾遂朝服補中益氣加桔梗貝母知母夕用歸脾湯送地黃丸而愈一瘵婦少寐經水兩月餘一至誤服通經丸展轉無寐午前惡寒午後發熱余以為思慮虧損脾血用歸

脾湯作丸午前以六君送下午後以逍遙散送下兩
月餘得寐半載經行如期年餘而瘡愈餘詳見各門

附方

補中益氣湯

方見二十四卷第十論

四君子湯

六君子湯

二方見二十四卷第六論

二陳湯

方見二十四卷第五論

越鞠丸

方見六卷第七論

歸脾湯

逍遙散

八珍湯

三方見二十四卷第四論

清胃散

方見二十四卷首論

六味丸

方見二十四卷第十一論

養生必用論第七

初虞世云女子十四天癸至任脈通月事以時于是有子天癸者物之自然月者以月至經者有常也其來過

與不及皆謂之病若榮血虧損不能滋養百骸則髮落面黃羸瘦燥熱燥氣盛則金受邪金受邪則為咳為嗽為肺癰為肺痿必矣但助胃壯氣則榮血生而經自行須慎飲食調七情保神氣庶可得生若暴怒氣逆經閉不行當用行氣破血之劑

愚按劉宗厚先生云榮者水穀之精和調於五臟灑陳於六腑乃能入於脈也源源而來生化於脾總統於心藏受於肝宣布於肺施泄於腎灌溉一身目得

之而能視耳得之而能聽手得之而能握足得之而能步臟得之而能液腑得之而能氣注之於脈少則瀦充則實常以飲食滋養則陽生陰長變化而為血諸經恃此則百脈長養耗竭則百脈空虛可不慎哉若陰氣一傷變症百出妄行於上則吐衄衰涸於下則癰閉血滲腸間則為腸風陰虛陽搏則為崩中濕蒸熱癩則為滯下熱極腐化則為膿血火極似水則血紫黑熱勝於陰發為瘡瘍濕滯於血則為痛痒癰

疹蓄之在上則善忘蓄之在下則善狂

琥珀散 治心膈迷悶肚腹撮痛月信不通等疾

烏藥 二兩 當歸 酒製 一兩 蓬朮 醋製 一兩

右為末每服二錢溫酒調

萬病丸 治月經瘀閉臍腹作痛及產後癥瘕等病

乾漆 炒烟出青 白為度 牛膝 酒浸焙 各一兩

右為末生地黄汁一升砂器慢火熬膏丸桐子大每服二十九空心米飲下仍參前論主之

紅花當歸散 治經候不行腰膝重痛小腹堅硬

紅花

當歸尾

酒拌

紫葳

牛膝

酒製

甘草

蘇木

各二

錢

白芷

桂心

各一錢半

赤芍藥

炒一兩

劉寄奴

去根五錢

右為末每服三錢溫酒調

室女月水不通方論第八

論曰夫衝任之脈起於胞內為經脈之海手太陽小腸
手少陰心二經為表裏女子十四而天癸至腎氣全盛
衝任流通經血既盈應時而下否則不通也

愚按前症若稟陰血不足用四物參苓怒傷肝血用
加味逍遙散鬱結傷脾用加味歸脾湯肝火拂鬱用
加味小柴胡湯胃經積熱用加味清胃散餘當參考
前論

附方

四物湯

方見二十四卷第六論

加味逍遙散

加味歸脾湯

二方見二十四卷第四論

加味小柴胡湯

方見二十四卷第二論

加味清胃散

方見二十四卷首論

室女經閉成勞方論第九

寇宗奭曰夫人之生以氣血為本人之病未有不先傷其氣血者若室女童男積想在心思慮過度多致勞損男子則神色消散女子則月水先閉蓋憂忿思慮則傷心而血逆竭神色先散月水先閉且心病則不能養脾故不嗜食脾虛則金虧故發嗽腎水絕則木氣不榮而

四肢乾痿故多怒鬚髮焦筋骨痿若五臟傷遍則死自能改易心志用藥扶持庶可保生切不可用青蒿虫蟲等涼血行血宜用栝子仁丸澤蘭湯益陰血制虛火

愚按經云五穀入於胃其糟粕津液宗氣分為三隧故宗氣積于胸中出於喉嚨以貫心肺而行呼吸滌氣者秘其津液注之於脈化以為血以榮四末內養五臟六腑若服苦寒之劑復傷胃氣必致不起

附治驗

一室女年十七瘵久不愈天癸未通發熱咳嗽飲食少思欲用通經丸余曰此蓋因稟氣不足陰血未充故耳但養氣血益津液其經自行彼惑於速效仍用之余曰非其治也此乃慄悍之劑大助陽火陰血得之則妄行脾胃得之則愈虛後果經血妄行飲食愈少遂致不救

栢子仁丸

栢子仁

研炒別

牛膝

酒製

卷栢

各半兩

澤蘭葉

一兩

右為末密丸桐子大每服三十九空心米飲下

澤蘭湯

澤蘭葉

二錢

當歸

芍藥

炒各一錢

甘草

炙五分

右水煎服

劫勞散 治勞嗽發熱盜汗體瘦唾中有紅或成肺痿

白芍藥

炒一錢

黃芪

炒

甘草

炒

人參

五味子

杵炒當

歸 半夏

薑製

白茯苓

熟地黄

自製

阿膠

炒各五分

右薑棗水煎日三服鄉人楊元鼎女及筭病此甚危

百藥無效偶遇名醫得此方服三十餘劑遂愈不發

血枯方論第十出駱龍吉方

腹中論曰有病胸脇支滿妨於食病至則先聞腥臊臭
出清液四肢清目眩時時前後血病名曰血枯此年少
時因大脫血或醉而入房虧損腎肝蓋肝藏血受天一
之氣以為滋榮其經上貫膈布脇肋若脫血失精肝氣
已傷肝血枯涸不榮而胸脇滿妨於食則肝病傳脾而
聞腥臊臭出清液若以肝病而肺乘之則唾血四肢清

目眩時時前後血出皆肝病血傷之症也

愚按前症若飲食起居失宜而脾胃虛損當滋化源而佐以烏賊丸等藥若因脾土虛寒而不能生血宜補命門火若服燥藥鬱火內作而津液消燦宜清熱養血若脾胃虧損而氣血虛宜補中益氣若胃熱消中而血液耗損宜清脾胃之火若大便秘澀小便清利而經不行宜清胞絡之火若勞傷心火血涸而經不行宜補心養血仍參看前第三論主治

附治驗

一婦人久患血崩肢體消瘦飲食到口則聞腥臊口
出清液每食少許腹中作脹此血枯之症肺肝脾胃
虧損之患用八珍湯烏賊骨丸兼服兩月而經行百
餘劑而安

烏賊魚骨丸

烏賊魚骨

去甲
四兩 蘭茹 一
兩

右為末以雀卵丸小豈大每服五丸加至十九丸鮑魚

煎湯下以飯壓之

熟地黄湯 治大脫血或醉入房月事不行以致前症

熟地黄

自製

澤蘭葉

白茯苓

人參

五味子

并炒

附子

炮

禹餘糧

製

當歸

酒製各五分

右為末每服三錢水煎空心服

附方

八珍湯

方見二十四卷第四論

茯苓補心湯 治婦人心氣虛耗不能主血又不能制

乎肺金氣得以乘乎肝木肝既虧損則血不能藏漸致精血枯涸月事不調此方專補心元之虛抑其肺氣調和榮衛滋養血脈

前方參蘇飲內除木香與四物湯對勻和每服四錢以薑棗煎溫服此方常進用以治宮娥多效

參蘇飲方見三

三卷首論四物湯方見二十四卷第六論

月水不利方論第十一

婦人月水不利者由勞傷氣血體虛而風冷客於胞內

傷於衝任之脈故也若寸脈弦關脈沈是肝病也兼主
腹痛孔竅生瘡尺脈滑血氣實經絡不利或尺脈絕不
至兼主小腹引腰痛氣攻胸膈也

愚按前症屬肝膽二經蓋肝膽相為表裏多因恚怒
所傷若本經風熱用補肝散血虛用四物加酸棗仁
若腎水不足用六味丸若患諸瘡瘍治見第八卷二
十四卷

牛膝散 治月水不利臍腹作痛或小腹引腰氣攻胸

膈

牛膝

酒製

桂心

赤芍藥

炒

桃仁

去皮尖

玄胡索

炒

當

歸

酒浸

牡丹皮

各一兩

木香

三錢

右為末每服一錢溫酒調下或每服三五錢水煎

附方

補肝散

方見七卷第十七論

四物湯

方見二十四卷第六論

六味丸

方見二十四卷第十一論

月水行止腹痛方論第十二

婦人經來腹痛由風冷客於胞絡衝任或傷手太陽少陰經用溫經湯桂枝桃仁湯若憂思氣鬱而血滯用桂枝桃仁湯地黃通經丸若血結而成塊用萬病丸

愚按前症若風寒傷胞者六君加炮薑思慮傷血者四物加參朮思慮傷氣者歸脾加柴梔鬱怒傷血者歸脾逍遙兼服餘參前後論治之

附治驗

一婦人經行腹痛食則嘔吐肢體倦怠發熱作渴此
乃素稟氣血不足用八珍湯二十餘劑而愈後生子
二年而經不行前症仍作服八珍湯逍遙散百餘劑
方愈

地黃通經丸 治月經不行或產後惡露臍腹作痛

熟地黃

自製
四兩

蛭蟲

去頭
翅炒

水蛭

糯米同炒
黃去糯米

桃仁

去皮
尖各

五十
枝

右為末密丸桐子大每服五七丸空心溫酒下

萬病丸 方見前第七論

溫經湯 治寒氣客於血室以致血氣凝臍腹作痛其

脈沈緊

當歸 川芎 芍藥 桂心 蓬朮 醋炒 牡丹皮 各五

分 人參 牛膝 酒炒 甘草 炒各一錢

右水煎服

桂枝桃仁湯 治經脈頓然不行腹中作痛或上攻心

脇欲死或因經脈不行漸成積塊臍下如覆杯

桂枝 芍藥

生地黄

各二錢

桃仁

七枚去皮尖

甘草

一錢

右薑水煎

若因七情鬱結血隨氣滯者宜服此湯如不瘥用地

黃通經丸已成血塊者用萬病丸

方見前

愚按前症若肝經怒氣用加味逍遙散若肝經血虛

用四物參朮柴胡牡丹皮若肝經血熱用四物牡丹

皮若肝腎虛火用六味地黃丸若肝脾血虛用八珍

加牡丹皮若肝脾鬱怒用加味歸脾湯若氣虛血弱

用補中益氣湯若脾不能攝血用六君子加川芎當歸若肝虛不能藏血用補肝散

附方

六君子湯

四物湯 二方見二十四卷第六論

歸脾湯

逍遙散

八珍湯

三方見二十四卷第四論

月水不斷方論第十三

婦人月水不斷淋瀝腹痛或因勞損氣血而傷衝任或因經行而合陰陽以致外邪客於胞內滯於血海故也但調養元氣而病邪自愈若攻其邪則元氣反傷矣

愚按前症若鬱結傷脾用歸脾湯恚怒傷肝逍遙散肝火妄動加味四物湯脾氣虛弱六君子湯元氣下陷補中益氣湯熱傷元氣前湯加五味麥門炒黑黃

栢

附治驗

儒者錢思習子室年三十餘無嗣月經淋瀝無期夫
婦異處幾年矣思習欲為娶妾以謀諸余余意此鬱
怒傷肝脾虛火動而血不歸經乃肝不能藏脾不能
攝也當清肝火補脾氣遂與加味歸脾逍遙二藥四
劑送至其家仍告其姑曰服此病自愈而當受胎妾
可無娶也果病愈次年生子

一婦人性急每怒非太陽耳項喉齒胸乳作痛則胸

滿吞酸吐瀉少食經行不止此皆肝火之症肝自病則外症見土受尅則內症作余先以四物加白朮茯苓柴胡炒梔炒龍膽清肺養血次用四君加柴胡芍藥神麩吳茱萸炒黃連以培土制肺漸愈惟月經不止是血分有熱脾氣尚虛以逍遙散倍用白朮茯苓陳皮又以補中益氣加酒炒芍藥兼服而安

一婦人多怒經行旬餘方止後淋瀝無期肌體倦瘦口乾內熱盜汗如洗日晡熱甚皆由肝脾虧損無以

生發元氣用參芪歸朮茯神遠志棗仁麥門五味丹
皮龍眼肉炙草柴胡升麻治之獲痊

一婦人懷抱不舒腹脹少寐飲食素少痰涎上湧月
經頻數余曰脾統血而主涎此鬱悶傷脾不能攝血
歸源耳用補中益氣濟生歸脾而愈

附方

歸脾湯

逍遙散

二方見二十四卷第四論

加味四物湯

四君子湯

六君子湯

補中益氣湯

四方見二十四卷第六論

婦人殺血心痛方論第十四

婦人血崩而心痛甚名曰殺血心痛由心脾血虛也若小產去血過多而心痛甚者亦然用烏賊魚骨炒為末醋湯調下失笑散亦效

愚按前症若陰血耗散用烏賊丸收斂之若瘀血不散用失笑散行散之若心血虛弱用芎歸湯補養之若鬱結傷血用歸脾湯調補之

附治驗

一婦人血崩兼心痛三年矣諸藥不應每痛甚虛症悉具面色痿黃余曰心主血益由去血過多心無所養以致作痛宜用十全大補湯參朮倍之三十餘劑稍愈百餘劑全愈

附方

失笑散

方見二十卷第五論

芎歸湯

方見十七卷第四論

歸脾湯

十全大補湯

二方見二十四卷第四論

暴崩下血不止方論第十五

婦人衝任二脈為經脈之海外循經絡內榮臟腑若陰陽和平經下依時若勞傷不能約制則忽然暴下甚則

昏悶若寸脈微遲為寒在上焦則吐血衄血尺脈微遲
為寒在下焦則崩血便血大抵數小為順洪大為逆大
法當調補脾胃為主

愚按經云陰虛陽搏謂之崩又云陽絡傷則血外溢
陰絡傷則血內溢又云脾統血肝藏血治法前症因
脾胃虧損不能攝血歸源用六君加芎歸柴胡若肝
經之火而血下行用竒効四物湯或四物加柴梔苓
朮若肝經風熱而血妄行用加味逍遙散或小柴胡

梔芍丹皮若怒動肝火而血沸騰亦用前藥若脾經鬱結而血不歸經用歸脾加柴梔丹皮若悲傷胞絡而血下崩用四君加柴梔升麻故東垣先生云凡下血症須用四君子以收功厥有旨哉若大吐血母以脈論當急用獨參湯救之若潮熱咳嗽脈數乃元氣虛弱假熱之脈尤當用人參溫補此等症候無不由脾胃先損故脈洪大察其有胃氣能受補則可救苟用寒涼止血之藥復傷脾胃反不能攝血歸源是速

其危也

附治驗

大尹王大成之內久患崩自服四物涼血之劑或作
或輟因怒發熱其血不止服前藥不應乃主降火更
加脇腹大痛手足俱冷余曰此脾胃虛寒所致先用
附子理中湯體熱痛止又用濟生歸脾補中益氣二
湯崩血頓愈若泥痛無補法則誤矣

錦衣楊永興之內患前症過服寒涼之劑其症益甚

卷二十六
更加肚腹痞悶飲食不入發熱煩躁脈洪大而虛余
曰此脾經氣血虛而發躁也當急用八珍湯加炮薑
以溫補之緩則不救不信乃服止血降火之劑虛症
蜂起始信余言緩不及治矣

一婦人面黃或赤覺腰間或臍下作痛四肢困倦煩
熱不安經行先發寒熱兩肋如束血湧如崩此脾胃
虧損元氣下陷與相火濕熱所致用補中益氣加防
風芍藥炒黑黃柏間以歸脾湯調補而血始歸經

一婦人因怒崩血久不已面青黃而或赤此肝木制脾土而血虛用小柴胡合四物清肝火生肝血又用歸脾補中二湯益脾氣生肝血而瘥此症若因肝經風熱而血不寧者防風為丸以兼症之藥煎送或肝經火動而血不寧者炒條芩為丸以兼症之藥煎送若瘀血為患用五靈脂為末燒鐵器淬酒調服無不效者

奇效四物湯 治肝經虛熱血沸騰而崩久不止

當歸

酒拌

熟地黄

自製

白芍藥

川芎

阿膠

炒

艾葉

炒

黃芩

炒各等分

右每服四錢水煎

治血崩血瘕或經行產後心腹脇痛五靈脂炒烟盡為末每服一錢温酒調或用三錢水酒童便煎服

治風熱血崩荆芥穗燈火燒焦為末每服三錢童便調獨聖散 治肝經有風血崩用防風去叉蘆為末每服一錢空心食前酒煮白麵清飲調下極驗

神應散 治血虛內熱血不歸源而崩用桂心燒存性
為末每服一二錢米飲調下

又方陳槐花一兩百草霜半兩為末每服一二錢燒紅
秤錘焯酒下

附方

四君子湯

六君子湯 二方見二十四卷第六論

補中益氣湯 方見二十四卷第十論

四物湯

方見二十四卷第六論

歸脾湯

加味逍遙散

八珍湯

三方見二十四卷第四論

小柴胡湯

方見二十四卷第二論

獨參湯

方見三卷第十三論

附子理中湯

方見二十卷第八論

帶下方論第十六

婦人帶下其名有五因經行產後風邪入胞門傳於臟腑而致之若傷足厥陰肝經色如青泥傷手少陰心經色如紅津傷手太陰肺經形如白涕傷足太陰脾經黃如爛瓜傷足少陰腎經黑如衄血人有帶脈橫於腰間如束帶之狀病生於此故名為帶

愚按徐用誠先生云前症白屬氣而赤屬血東垣先生云血崩久則亡陽故白滑之物下流未必全拘於帶脈亦有濕痰流注下焦或腎肝陰淫之濕勝或因

驚恐而木乘土位濁液下流或思慕為筋痿戴人以
六脈滑大有力用宣導之法此瀉其實也東垣以脈
微細沈緊或洪大而虛用補陽調經乃兼責其虛也
丹溪用海石南星椿根皮之類乃治其濕痰也竊謂
前症皆當壯脾胃升陽氣為主佐以各經見症之藥
色青者屬肝用小柴胡加山梔防風濕熱壅滯小便
赤濇用龍膽瀉肝湯肝血不足或燥熱風熱用六味
丸色赤者屬心用小柴胡加黃連山梔當歸思慮過

傷用妙香散等藥色白者屬肺用補中益氣加山梔
色黃者屬脾用六君子加山梔柴胡不應用歸脾湯
色黑者屬腎用六味丸氣血俱虛八珍湯陽氣下陷
補中益氣湯濕痰下注前湯加茯苓半夏蒼朮黃柏
氣虛痰飲下注四七湯送六味丸不可拘肥人多痰
瘦人多火而以燥濕瀉火之藥輕治之也

附治驗

一媼婦腹脹脇痛內熱晡熱月經不調肢體痠麻不

時吐痰或用清氣化痰喉間不利帶下青黃腹脇膨脹又用行氣之劑胸膈不利肢體如麻此乃鬱怒傷損肝脾朝用歸脾湯以解脾鬱生脾氣夕用加味道遙散以生肝血清肝火百餘劑而愈

一婦人久瘧兼帶發熱口乾體倦用七味白朮散加麥門五味大劑煎與送飲再發稍可乃用補中益氣加茯苓半夏十餘劑而愈

一婦人頭暈吐痰胸滿氣喘得食稍緩苦於白帶二

十餘年矣諸藥不應此氣虛而痰飲也痰飲愈而帶
自愈遂朝用六君子湯夕用六味地黃丸不月而驗
一婦人耳鳴胸痞內熱口乾喉中若有一核吞吐不
利月經不調兼之帶下余以為肝脾鬱結用歸脾湯
加半夏山梔升麻柴胡間以四七湯下白丸子而愈
一婦人吞酸飽滿食少便泄月經不調服清氣化痰
丸兩膝漸腫寒熱往來帶下黃白面痿體倦此脾胃
俱虛濕痰下注用補中益氣倍用參朮加茯苓半夏

炮薑而愈

一婦人帶下四肢無力余曰四肢者土也此脾胃虛弱濕痰下注以補中益氣濟生歸脾二藥治之而愈
一婦人帶下黃白怒則胸膈不利飲食少思或用消導利氣之藥痰喘胸滿大便下血余曰此因脾氣虧損不能攝血歸源用補中益氣加茯苓半夏炮薑四劑諸症頓減又用八珍加柴胡山梔而痊

附方

小柴胡湯

方見二十四卷第二論

龍膽瀉肝湯

方見二十四卷第八論

六味丸

方見二十四卷第十一論

妙香散

方見三卷第十三論

補中益氣湯

六君子湯

二方見二十四卷第六論

歸脾湯

八珍湯

加味逍遙散

三方見二十四卷第六論

七味白朮散

方見二十一卷第二論

四七湯

方見十二卷第七論

白丸子

方見三卷第四論

崩中漏血生死脈方論第十七

婦人崩中漏下之症已見前論按其寸口脈弦而大弦則為緊大則為扎緊則為寒扎則為虛虛寒相搏其脈為牢婦人半產漏下赤白不止脈小虛滑者生脈大緊

實數者死又脈急疾者死遲者生又云尺寸脈虛者漏血脈浮者俱不治

愚按前症關內經微旨濟無窮天札須固胃為善蓋胃為五臟之本源人身之根蒂所用治法當參前後論

附治驗

一婦人年將七十素有肝脾之症每作則飲食不進或胸膈不利或中脘作痛或大便作瀉或小便不利

余用逍遙散加山梔茯神遠志木香而愈後憂女媼
居不時吐紫血其病每作先倦怠而後發熱經曰積
憂傷肺積思傷脾肺布葉舉是令子母俱病不能攝
血歸經而致前症遂以前藥加炒黑黃連三分吳茱
萸二分頓愈復因怒吐赤血甚多躁渴垂死此血脫
也法當補氣乃用人參一兩苓朮當歸各三錢陳皮
炮黑乾薑各二錢炙草木香各一錢一劑頓止

一婦人年六十有四久鬱怒頭痛寒熱春間乳內時

痛服流氣飲之類益甚不時有血如經行又因大驚
恐飲食不進夜寐不寧此因高年去血過多至春無
以生發肝木血虛火燥所以至晚陰旺則發赤經云
肝藏魂魄無所附故不能寐先以逍遙散加酒炒黑
龍膽草一錢山梔一錢五分二劑腫痛頓退又二劑
而全消再用歸脾湯加炒梔貝母諸症悉愈

表弟方健甫內五十歲辛丑患血崩諸藥罔效壬寅
八月身熱體痛頭暈涕出吐痰少食衆作火治展轉

發熱絕粒數日余診之曰脾胃久虛過服寒藥中病未已寒病復起遂用八味丸料一服翌早遂索粥數匙再服食倍熱減痛止乃服八味丸而愈癸卯秋因勞役憂怒甲辰夏病復作胸飽發熱脊痛腰疼神氣怫鬱或作內傷或作中暑崩血便血煩渴引飲粒米不進昏憤時作脈洪大按之微弱此無根之火內虛寒而外假熱也以十全大補加附子一劑遂食粥三四匙崩血漸減日服八味丸始得全愈

備見女科提要

栢葉散 治元氣虛弱崩中漏血年久不愈亦治白帶

栢葉 炒 續斷 酒炒 川芎 生地黄 當歸 鼈甲 炙

龜甲 禹餘糧 各兩 阿膠 炙 赤石脂 煨 牡蠣 煨 地

榆 艾葉 炒 鹿茸 炙 各五錢

右為末每服二錢粥飲調下

地黄丸 治足三陰虧損經行數日不止或兼帶下無

子

熟地黄 自製 山茱萸肉 蕪荑仁 各一兩 乾薑 三錢 白

芍藥

微炒

代赭石

各一兩

白殭蠶

炒

厚朴

薑製各三錢

右為末密丸桐子大每服五十九丸空心溫酒日三服
許學士云凡婦人有白帶多致不產育宜速治之故
扁鵲過邯鄲聞婦人有此病遂自名帶下醫以就治
之

白芷散 治下元虛弱赤白帶下或經行不止等症

白芷

一兩 海漂蛸

二枚

胎髮

一團

右為末每服二錢溫酒調下

附方

東垣益胃升陽湯 治血脫當益其氣蓋先補胃氣以助生發之氣故曰陽生陰長諸甘藥為之先務舉世皆以為補氣殊不知甘能生血此陽生陰長之理故理胃氣則血歸於脾矣故曰脾統血

東垣升麻除濕湯

二方見二十卷第九論

東垣升陽益胃湯 治肺脾胃虛怠惰嗜卧四肢不收身體沈重口乾食無味大便不調小便頻數食少食

不消洒淅惡寒而或微熱崩帶不止

方見三卷第十
三論

十全大補湯

逍遙散

歸脾湯

三方見二十四卷第四論

八味丸

方見二十四卷第十一論

婦人白濁白淫方論第十八

婦人小便白濁白淫由心腎不交水火不濟用金鎖正
元丹若心虛而致用平補正心丹降心丹威喜丸若思

慮傷脾用四七湯吞白丸子更以烏沈湯加茯苓益智
愚按前症若元氣下陷用補中益氣湯脾胃虧損六
君加升麻柴胡脾經鬱結歸脾加黃栢山梔肝經怒
火龍膽瀉肝湯虛則用加味道遙散宜與帶下參看
主治

一婦人善怒或小腹痞悶或寒熱往來或小便頻數
時下白淫藥久不愈面青口苦余以為積憤而不能
發散所致用龍膽瀉肝湯而愈用加味道遙散八瓊

湯而安

鎖精丸 治下元虛弱小便白濁或白帶淋漓小便頻

數

破故紙

炒

青鹽

白茯苓

皮去

五味子

炒等分

右為末酒糊丸桐子大每服三十九丸鹽湯或酒下

固精丸 治胞氣虛寒小便白濁或小便無度等症

牡蠣

煨

兔絲子

酒浸蒸炒

韭子

炒

龍骨

煨

五味子

炒

白

茯苓

皮去

桑螵蛸

酒炙

白石脂

煨

右等分為末酒糊丸桐子大每服七十九空心鹽湯

下

附方

補中益氣湯

方見二十四卷第十論

六君子湯

方見二十四卷第六論

歸脾湯

方見二十四卷第四論

龍膽瀉肝湯

方見二十四卷第八論

婦人天癸過期方論第十九

許學士云婦人經脈過期不盡腰腹疼痛或七七數盡而月經下者宜用當歸散治之

愚按前症若肝腎虛熱用當歸散肝血虛熱四物加柴梔丹皮肝火內動小柴胡加山梔丹皮肝火血燥加味逍遙散脾經鬱火加味歸脾湯肝脾鬱火歸脾逍遙兼服肝腎虧損歸脾六味兼服仍與前後月經不調治驗同用

附治驗

一婦人年五十內熱晡熱經水兩三月一至此血虛
有熱用逍遙散加山茱萸治之而愈後有痰作渴或
小便不調或頭暈白帶用六味丸而安

當歸散

當歸酒洗 川芎 白芍藥炒 黃芩炒 白朮炒 山茱
半兩

萸肉一兩
半

右為末每服二錢酒調日三服氣虛去芩加桂心一

兩

附方

四物湯

方見二十四卷第六論

小柴胡湯

方見二十四卷第二論

加味逍遙散

加味歸脾湯

二方見二十四卷第四論

六味丸

方見二十四卷第十一論

婦人血分水分腫滿方論第二十

婦人經水不通則化為血血不通則復化為水故先因

經水斷絕後至四肢浮腫致小便不通名曰血分宜用
椒仁丸若先因小便不通後身面浮腫致經水不通名
曰水分宜用葶藶丸經脈不通而化為水流走四肢悉
皆腫滿亦名血分其症與水症相類實非水也用人參
丸

愚按前症或因飲食起居失養或因六淫七情失宜
以致脾胃虧損不能生發統攝氣血乖違行失常道
若先因經水斷絕後至四肢浮腫小便不通血化為

水名曰血分宜用椒仁丸治之若先小便不利後至
身面浮腫經水不通水化為血名曰水分宜用葶藶
丸治之此屬形氣不足邪淫隧道必用此藥以宣導
其邪而佐以補輔元氣之劑庶使藥力有所仗而行
則邪自不能容而真氣亦不至於復傷矣大凡月水
不通凝結於內久而變為血瘕血水相并亦為水腫

附治驗

一婦人月經不調晡熱內熱飲食少思肌體消瘦小

便頻數或用濟陰丸月經不行四肢浮腫小便不通
余曰此血分也朝用椒仁丸夕用歸脾湯漸愈服人
參丸兩月而愈仍專用歸脾湯五十餘劑而平

一婦人面目浮腫月經不通此水分也朝用葶藶丸
夕用歸脾湯漸愈更兼服人參丸而全愈

一婦人素性急先因飲食難化月水不調或用理氣
化痰藥反肚腹膨脹大便泄瀉又加烏藥蓬朮肚腹
腫脹小便不利加猪苓澤瀉痰喘氣急手足厥冷頭

面肢體腫脹指按成窟脈沈細右寸尤甚余曰此脾肺虛冷不能通調水道下輸膀胱滲泄之令不行生化之氣不運東垣云水飲留積若土在雨中則為泥矣得和氣暖日水濕去而陽化自然萬物生長喜其脈相應遂與金匱加減腎氣丸料服之小便即通數劑腫脹消半四肢漸溫自能轉側又與六君加木香肉桂炮薑治之全愈後不戒七情不節飲食頓作泄瀉仍用前藥加附子五分而安

椒仁丸 治血分

椒仁 甘遂 續隨仁 附子炮 郁李仁 黑牽

牛 五靈脂開 吳茱萸 玄參 紅花酒炒

信礪 膽礪錢 斑猫糯米炒 芫青各三十箇糯米炒黃

去頭
足

右為末麵糊丸菴苳大每服一丸陳皮湯送下

人參丸 治月經不利而化為水流走四肢悉皆腫痛

人參 當歸 大黃蒸熟切培 桂心 藎麥穗 赤芍

藥

白茯苓

各三兩

葶藶

炒研一兩

右為末煉蜜丸桐子大每服十五丸空心米飲下

葶藶丸 治水分

甜葶藶

妙別研五錢

續隨仁

五錢別研

乾笋末

一兩

右用棗肉丸桐子大每服七丸煎扁竹湯下如大便利減續隨子葶藶各一錢加白朮半兩

小調經散 治經水失道流入四肢浮腫

方見產後四肢浮腫

附方

歸脾湯 方見二十四卷第四論

金匱加減腎氣丸 方見二十二卷第十論

六君子湯 方見二十四卷第六論

衆疾門

經脈不調衆疾
生焉故以次之

產寶方論第一

古人治婦人別著方論者以其胎妊生產崩傷之異况
鬱怒倍於男子若不審其虛實而治之多致天枉

愚按前說誠為精確諺云寧治十男子莫治一婦人

寧治十婦人莫治一小兒義可見矣

博濟方論第二

夫人將攝順理則氣血調和六淫不能為害若勞傷血氣則風冷乘之脾胃一傷飲食漸少榮衛日衰肌膚黃燥面無光澤若入大腸則下利若入闕元則絕嗣故婦人病有三十六種皆由衝任勞損而致蓋衝任之脈為十二經之會海其病皆見於少陰太陽之經當於此候之

愚按前論精密學者當從此類推之

寇宗奭論第三

婦人雖有別科然亦有不能盡聖人之法岐伯曰凡病
察其形氣相得則易治形氣相失則難治又曰診病之
道觀人勇怯骨肉皮膚能知其情以為診法今富貴之
家身處帷幔出手診候不能盡望聞問切之情率爾投
藥烏可盡其術乎況醫者質問諄諄病家遂謂術業不
精而不信豈能使藥之奏效耶丹溪云凡人之形長不

及短大不及小肥不及瘦人之色白不及黑嫩不及蒼
薄不及厚而沉肥人濕多瘦人火多白者肺氣虛黑者
腎氣足形色既殊臟腑亦異外證雖同法法迥別所以
肥人責脈浮瘦人責脈沈躁人疑脈緩緩人疑脈躁以
其不可槩觀也若夫病勢危急必須察色以觀其外診
脈以知其內醫之道庶乎不至於有誤矣

府庠徐道夫母胃脘當心痛極右寸關俱無左雖有
微而欲絕手足厥冷余以上部無脈不吐為不治然

察其眼胞上下青黯此脾虛肝木所勝以參朮茯苓
陳皮甘草補中益氣以木香和胃氣行肝氣以吳茱
萸散脾胃之寒止心腹之痛遂急與一劑連去二次
再進諸病悉愈

通用方序論第四

夫通用方者蓋產前產後皆可用也或一方治諸症不
可入專門當通變而施治焉烏可泥也

加減四物湯 治血虛月經不調腰腹作痛崩中漏下

半產產後惡露內停或去血過多而痛

方見第八十三論

愚按血虛之症若肝脾血燥用加味道遙散肝火血燥用八珍湯加山梔牡丹皮肝經風熱血燥用六味地黃丸肝脾火燥血虛用四物柴胡山梔肝經氣血虛弱用四君芎歸熟地腎水涸而肝血虛用六味地黃丸金尅木而肝血虛與心火亢而肝血虛亦用前丸若氣虛而血弱用補心湯胃氣陷而血虛用補中益氣湯脾氣弱而血虛用六君子湯脾氣鬱而血虛

用加味歸脾湯大凡血虛之症或氣虛血弱或陽氣
脫陷或大失血以致發熱煩渴等症必用四君歸芪
或獨參甘溫之劑使陽旺則陰生其病自愈若用寒
涼降火乃速其危也

交加散 治經脈不調腹中撮痛或結聚癥瘕產後中
風

生地黄

一觔
取汁

生薑

十二兩
取汁

右以地黄汁炒薑相薑汁炒地黄相乾為末每服三

錢溫酒調加芍藥玄胡索當歸蒲黃桂心各一兩沒
藥紅花各五錢尤效

補中丸

治氣血俱虛諸症即八珍湯為丸

方見二十四卷第四

論

附方

加味歸脾湯

加味道遙散

八珍湯

三方見二十四卷第四論

六味丸 方見二十四卷第十一論


四物湯

四君子湯

六君子湯

補中益氣湯 四方見二十四卷第六論

獨參湯 方見三卷第十三論



薛氏醫案卷二十六